

Zavoloc, Sochazonia, Vasovia, Gostine, Visne, Racicz, Sieprecense, Wisogrod, Riprin, ZabrochXinense, Circhanovia, Livense. In Lithuania *Vilna, Trochi;* In Prussia *Culma, Elbingen, Pomerania.* Capitanei, cujus officii permulti sunt in toto Poloniae Regno. Marefcalli 11, Regni & Curiae Regiae. Status Ecclesiasticus constat his Archiepiscopis & Episcopis, qui dicti sunt. Viri plerique Nobiliores, excellenti ingenio praediti sunt, multisque & longinquis peregrinationibus prudentiam sibi & multarum linguarum peritiam compararunt: Impavidi sunt, & cum hoste etiam robustissimo pugnam non detrectant; laesi a Magnatibus, injuriam omni consanguineorum, clientum, amicorum, & familiarium confederata manu ultum eunt, neque ante cessant, quam vel vindicarint, vel occubuerint. Postremum non tam liberales sunt quam profusi: quod vitium augent frequentibus commestationibus, & immodicis largitionibus; tum etiam ingenti clientum servorumque quos alunt, vestiunt, & ornant numero.

Silesia.

ET haec de Poloniae Regno: restat paucis explicanda *Silesia.* Nomen illi ab amne cognomini, ut tradit Conradus Celtes. Alij aliunde derivant. Terminatur a Septentrione & Ortu Polonia: a Meridie Moravia & Hercynia Silva, ab Occidente Lusatiae & Bohemiae parte. Longitudo est CC mill. pass. Latitudo LXXX. Aer quamvis paulo frigidior, utcunque tamen mitis & clemens. Ager quod crebris torrentibus ac rivulis irrigetur, fertilis admodum est, ac res nascentes ex terra, magna ubertate in plerisque locis fundit, & alicubi venas Auri, Argenti, Plumbi, & Ferri gignit: res etiam ad vestitum non modo suarum, sed multarum etiam gentium conficiendum largissime suppeditat. Urbes hic cultae & legibus artiumque humanarum studiis ornatae. Metropolis ejus est *Uratislavia, Budorchis* ut quidam volunt Ptol. vulgo *Breslaw.* Duglossus scribit, eam exstructam a Miesslera Duce Poloniae, paulo ante annum Christi millesimum. Inde post annos XI ornata esse Episcopatu a Casimiro Rege Poloniae: his incrementis tantum aucta est, ut ejus Civitatis Antistites *Aurei Episcopi* ob divitias & rerum omnium copiam dicerentur. Anno CIOCCCXLI tota in favillas abiit. Sed sub Carolo III Imperatore ex lateritia facta est aurea. Memorabile est quod de Turri templi S. Elizabethae testatur sequens inscriptio. MIRABILIS IN ALTIS DOMINVS. Situs loci, aedificiorum splendor, turrium, templorum, pontium structura, platearum dispositio, urbem vehementer commendant. *Nissa* Episcopalis est Civitas. Sunt praeterea in hoc tractu Duc. XV, *Lignicensis, Bregensis, Teschinensis, Monsterbergensis, Olsvicensis, & Becusadiensis;* tres veteres familiae, videlicet *Lignicensis, Teschinensis, & Monsterbergensis* adhuc obtinent. *Tropaviensis, Opoliensis, Nissensis, Uratislaviensis, sive Breslaw, Swidnicensis, Hurensis, Glagoviensis, Ratibonnensis, & Sagonensis:* Sed hos postremos Reges Bohemiae, extinctis veteribus dominis adepti sunt. Baronum III Familia, videlicet a *Trachenberg, Vertenberg, & Plessensis.* Supremum Regis Tribunal in Silesia est *Uratislaviae,* ubi & sedes est Episcopalis, quemadmodum & *Nissa.* *Viadrus* per hanc regionem labitur, in quem undique plures amnes & rivi confluent, *Elsa, Ola, Bobrus, Barusius* & alii.

Regio & unda ducta.

Situs.

Caeli temperies. Soli fertilitas.

Urbes.

Flumina.